

SEGUNDA EPÍSTOLA DEL APÓSTOL SAN PABLO A TIMOTEO

Salutación

¹ Huēj huin Pablo. Nī huēj huin apóstol a'mī sinuguan' Jesucristo rian ni ngüi. Nī nan huin sun huin ruhua Yan'anj guj'yaj sūnj. Nī hué daj 'yā xi'í si hua gataj yya Yan'anj sisi ga nī'na' niganj né', guj'yaj Cristo Jesús.

² Nī a'nī 'ngo yanj carta huaj rián re' huín re' Timoteo. Nī rún' huin da'nī 'i ruhuāj huín re': Nī Yan'anj huin chrej né'. Nī Jesucristo huin Señor nicaj sun rian né'. Nī huin ruhuāj sisi guj'yaj Yan'anj sinduj rián re'. Nī nahuin 'i ruhua Yan'anj nī'yaj re' nej. Nī gahuin din'inj ruhuá re' nej. Nī hué daj guj'yaj Jesucristo nga re', ruhuāj aj.

Testificando de Cristo

³ Nī a'uīj si guruhua Yan'anj sisi niganj nanun ruhuāj ni'yā sɔ' ngaa achinj jni'yā nugüi nigan' rian Yan'anj. Nī huēj unánj guitsi rian Yan'anj daj rún' guj'yaj ni xīj guimán asij ná. Nī nitaj si da'uī gaquin' mánj. ⁴ Nī nanun ruhuāj daj gacó re' xi'īj. Nī xi'í daj huin ruhuāj guchi' ni'yā rian nné re' sisi gahuin niā' ruhuāj, guj'yáj re'. ⁵ Daj si nanun ruhuāj sisi nun digya' yun'únj re' ngaa xuman ruhuá re' ni'yáj re' Yan'anj. Nī hué daj guxuman sini ruhua xuguan'ánj re' gu'naj Loida

nga nní re' gu'naj Eunice nej. Ní gahuin yya ruhuāj sisi hué daj xuman ruhuá re' nej. ⁶ Xi'í daj ní gataj snan'an gunun re' sisi gahuin nucuj ruhuá re' nga sinduj gui'yaj Yan'anj rián re' ngaa gutaj ra'āj chrā re'. Ní sinduj daj gui'yaj sisi ga'ue gui'yaj 'ueé re' si-sun Yan'anj anj. ⁷ Daj si sé si riqui Yan'anj sisi guxu'ui' né' mánj. Saní riqui Yan'anj sisi nari' nucuj niman né'. Ní ga'ue gahuin 'i ruhua né' guini'yaj né' ni dugüi' né'. Ní ga'ue dugumi né' man'an né', gui'yaj Yan'anj.

⁸ Xi'í daj ní sī guirí' re' si-na'aj nani re' nuguan' sa' xi'í Señor rian ni ngüi mánj. Ní sī guirí' re' si-na'aj xi'í si nünj ducuaga' xi'í Señor. Saní guinicaj dugüi' re' ngāj huñj tsínj ran' sayun xi'í si a'mī nuguan' sa' xi'í Jesucristo rian ni ngüi. Ní hué daj gui'yaj re' nga si-fuerza Yan'anj anj. ⁹ Ní nacaj Yan'anj né'. Ní gaquínj Yan'anj né' sisi ga sa' né' rian Yan'anj. Ní sé xi'í si gui'yaj sa' né', ní gui'yaj Yan'anj daj nga né' mánj. Maan si gui'yaj Yan'anj daj xi'í si hué daj gani sa' ruhua Yan'anj xi'í né'. Ní asij ná sno'o ngaa achin gahuin xungüi nan, ní gui'yaj Yan'anj sinduj xi'í Cristo Jesús rian né'. ¹⁰ Saní yyaj ní digyán yya Yan'anj sinduj nan rian né'. Daj si ga'na' xanga' tsínj nacaj né' huin sí' Jesucristo, gui'yaj Yan'anj. Ní Jesucristo gui'yaj sisi sī gahui' né' mánj. Ní riqui Jesucristo sisi hua ní'na' né', ní gane niganj né' nga Yan'anj xi'í nuguan' sa' 'na' rian Yan'anj anj.

¹¹ Ní garij Yan'anj sun man'anj sisi ga'mī nuguan' sa' nan rian ni ngüi. Ní hué daj garij Yan'anj sun man'anj sisi gahuñj apóstol digyānj

si-nuguan' Jesús rian ni ngüi 'na' anéj chrej.
 12 Ní xi'í daj ran'ānj sayun acuan'. Saní nitaj si huin na'ā xi'í sayun ran'ānj mánj. Daj si ni'i man'ānj sisi guxuman ruhuāj ni'yā Yan'anj. Ní gahuin yya ruhuāj sisi nucuj Yan'anj dugumi sij man'ānj da' güi ga'na' ruhua' yún Jesús. Daj si hua naga'ui' man'ānj rian sij.

13 Ní gunun sa' ruhuá re' ni nuguan' sa' digyānj rián re'. Ní daj rún' gunún re', ní hué daj gui'yáj re'. Ní gahuin 'i ruhuá re' ni'yaj re' man'an sij.
 14 Ní dugumi sa' re' sun garasun Yan'anj man'án re'. Ní chracuij Espíritu Santo sisi hué daj gui'yáj re', ruhuāj aj. Daj si nne Espíritu Santo chruhua niman né'.

15 Ní ni'í re' sisi daran' ni tsínj man estado Asia duna man'ānj. Ní hué daj gui'yaj nungüej tsínj gu'naj Figelo nga Hermógenes. 16 Ní huin ruhuāj sisi nahuin 'i ruhua Señor ni'ya ni ducua tsínj gu'naj Onesíforo. Daj si nico' huaj gahuin niā' ruhuāj, gui'yaj sij. Nun gahuin na'aj sij ga'na' ni'yaj sij rian nūnj ducuaga' mánj. 17 Ní nun duna sij si nano' sij man'ānj ngaa gane sij xuman' Roma. Ní hué daj gui'yaj sij da' nari' sij man'ānj. 18 Ní huin ruhuāj sisi nahuin 'i ruhua Señor ni'ya sij ngaa guisij güi ga'na' ruhua' yún Señor. Ní hua ni'i sa' re' daj chracuij Onesíforo yunj xuman' Efeso aj.

2

Un buen soldado de Jesucristo

1 Ní rún' huin da'nī huín re' riānj. Ní huin ruhuāj sisi gahuin nucuj nimán re' nga sinduj

riqui Jesucristo rián re'. ² Nĭ hua nico ni ngüi gunun nuguan' gatā gunún re'. Ngaa nĭ dugutā sún re' ni nuguan' daj ango ni tsínj hua nĭca ruhua sisi dĭgyán ni sí' rian ango ni ngüi.

³ Nĭ daj rún' ran' 'ngo snado sayun huaj sij rian huin sayun, nĭ hué daj gunucuj re' sayun xi'í si nicaj dugüi' re' nga Jesucristo aj. ⁴ Nĭ na'ue gahui 'ngo snado hue' rian nne ni snado gan'anj gui'yaj sun sij ango sun mánj. Sanĭ maan si ruhua sij gui'yaj sun sij daj rún' aran' ruhua snado huin achij a'nin' rian sij. ⁵ Nĭ hué ducuánj daj huin, nĭ na'ue gui'yaj gana ni tsínj ducu luta trofeo sisi na'uej ruhua ni sij dagahuin ni sij rún' ataj tsínj a'nin' niquin' rian ni sij mánj. ⁶ Nĭ tsínj anáj xĭna, nĭ hua niān si nahuin ra'a sini man'an sij si gā'ui' nna daj. ⁷ Nani ruhuá re' nga nuguan' atā gunun re'. Nĭ Señor gui'yaj sisi gara da'nga' ruhuá re' daran'anj, ruhuāj aj.

⁸ Sĭ guini'yun ruhuá re' xi'í Jesucristo. Nĭ sĭ guini'yun ruhuá re' sisi ganá'nij sij scanij ni níman. Nĭ huin sij da'nĭ si'nĭ rey David. Nan huin nuguan' sa' natāj gunun ni ngüi. ⁹ Nĭ xi'í nuguan' nan ran'ānj sayun. Nĭ daj rún' nun 'ngo tsínj gui'yaj gaquin' ducuaga', nĭ hué daj nūnj ducuaga' nej. Sanĭ güenda si-nuguan' Yan'anj, nĭ sĭ ga'ue gari ni sij ducuaga' mánj. ¹⁰ Xi'í daj a'nin' ruhuāj nga sayun ran'ānj nan xi'í si 'ĭ ruhuāj ni'yā ni ngüi ganacui Yan'anj. Ngaa nĭ gā'ue nācaj Yan'anj ni sij ngāj xi'í si gui'yaj Cristo Jesús xi'í né'. Nĭ gane 'ueé nĭganj né' nga Yan'anj anj.

¹¹ Nan huin nuguan' xānga':

Nĭ sisi gahui' né' nga Cristo,

n̄i hué daj ḡa n̄i'na' né' nga sij.

¹² Sisi guiran' né' sayun nga sij,
n̄i ḡa'ue guinicaj sun né' nga sij.

N̄i sisi ḡataj né' sisi nitaj si nicaj dugüi' né' nga
sij,

ngaa n̄i hué guē daj ḡataj sij sisi nitaj
si nicaj dugüi' sij nga né' nej.

¹³ Sisi nitaj si hua n̄ica ruhua né' nga sij,
san̄i hua guē hua n̄ica ruhua sij nga né'.

Daj si na'ue nađuna sij nuguan' ga'mi sij rian né'.
Daj huin nuguan' x̄anga' daj.

Un obrero aprobado

¹⁴ Hué dan n̄i na'nij re' chruhua ango ni sij sisi
s̄i guini'yun ruhua ni sij ni nuguan' nan mánj.
N̄i rian Señor, n̄i hué daj ḡataj snan'ánj re' rian
ni sij sisi s̄i gunun' ni sij xi'í ni nuguan' a'mi ni
sij mánj. Daj si nun ní'yanj sisi hué daj 'yaj ni
sij. N̄i ni tsínj unun' xi'í ni nuguan' daj, n̄i guere'
ni sí' si-chrej ni sí'. ¹⁵ Ra'yanj re' sisi ḡahuin sa'
re' rian Yan'anj. Ngaa n̄i ḡa'ue ḡataj Yan'anj sisi
gui'yaj sun 'ueé re' rian sí'. N̄i s̄i ḡahuin na'aj re'
xi'í sun 'yaj sún re' mánj. Ngaa n̄i ḡa'ue nata'
n̄ica re' si-nuguan' Yan'anj huin nuguan' x̄anga'.

¹⁶ N̄i s̄i diguǐj re' nga ni nuguan' nitaj si ní'yanj
'na' chruhua xungüi' nan mánj. Daj si ni tsínj
a'mi ni nuguan' daj, n̄i naanj diguǐj ni sij nga
nuguan' quij hua. ¹⁷ N̄i daj rún' 'yaj 'ngō ya'ui
ngaa huin xachi ya'yoj, n̄i hué daj guiran' ni ngüi
gunun si-nuguan' ni sij. N̄i hué daj ḡahuin nga
n̄ungüej tsínj gu'naj Himeneo nga Fileto. ¹⁸ N̄i
achéj n̄ungüej sij ango chrej digyán n̄ungüej sij
'ngō nuguan' sé huin x̄anga'. N̄i ataj n̄ungüej sij

sisi hua ganá'nij ni níman. Ni hua duna da'aj ni ngüi si xuman ruhua ni sij nga nuguan' xanga', gui'yaj nungüej sij. ¹⁹ Sanj daj rún' hua ran xi'í hue', ni hué daj hua ran si-nuguan' Yan'anj. Ni ga'ui' Yan'anj 'ngo sello. Ni gataj sello daj: "Ni'i Señor ni ngüi nico' sij." Ni: "Gahuin nini daran' án re' rian gaquin' huin ni é re' tsínj nata' sisi nico' a ni é re' Señor." Daj gataj nungüej nuguan' daj.

²⁰ Ni ducúa 'ngo xuru'ue, ni man rasun huin oro nga rasun huin plata nej. Ni man ni rasun huin chrun nga ni rasun huin siu yo'ój nej. Ni go'ngo ni rasun daj huin si arasun ninaj ni sij. Ni ango ni rasun daj huin ni rasun niqúi arasun sij. ²¹ Ni hué daj huin nga né'. Ni sisi huin ruhua né' si garasun ninaj Yan'anj né', ni hua nian si gahuin nini né' rian daran' ni tsínj 'yaj quij daj. Ngaa ni ni'yanj né' gui'yaj sa' né' daran' ni nuguan' sa' rian Yan'anj.

²² Ni si ga'uej ruhua re' nga ni nuguan' quij 'yaj ni tsínj hua lij. Sanj gache re' 'ngo chrej nica. Ni guxuman ruhua re' ni'yaj re' Yan'anj. Ni gahuin 'i ruhua re' ni'yaj re' Yan'anj nej. Ni ga din'inj ruhua re' nej. Ni hué daj gui'yaj nuguan'an re' nga daran' ni tsínj hua sa' niman huin ni sij ni tsínj achínj jni'yaj rian Señor. ²³ Ni si xacáj re' cuenta ngaa a'mi ni sij nuguan' ni'yun manj. Daj si nitaj si ni'yanj ni nuguan' daj. Ni hua ni'í re' sisi unun' ni ngüi 'yaj ni nuguan' daj.

²⁴ Ni 'ngo tsínj 'yaj sun si-sun Señor, ni si ga'ue gunun' sij nga ni dugüi' sij manj. Sanj hua nian si ga ni'yanj sij nga daran' ni ngüi. Ni guini'i

sa' sij nuguan' digyán sij rian ni ngüi. Nî ga'nin' ruhua sij nga ni tsínj chran' yun'unj sij. ²⁵ Nî ngaa digyán sij rian ni tsínj unun' nga sij, nî hua nian si ga'mi nanaj sij nga ni sí'. Daj si ana'uij sij sisi nanicaj ruhua ni sí' guini'i ni sí' nuguan' xanga', gui'yaj Yan'anj. ²⁶ Nî ana'uij sij sisi ganun ruhua ni sí' gunánj ni sí' rian sichre. Daj si yyaj nî 'yaj sichre daj rún' huin ruhua sij gui'yaj sij nga ni sí'.

3

Carácter de los hombres en los postreros días

¹ Nî hua nian si guini'í re' sisi ngaa ruhua ganahuij xungüi, nî ga'na' nico sayun. ² Daj si gahuin 'i ruhua ni ngüi nî'yaj ni sij man'an ni sij. Nî gahuin ruhua ni sij gui'yaj gana ni sij nico san'anj. Nî gahuin nne ni sij nej. Nî ga'mi 'ueé ni sij xi'í man'an ni sij. Nî ga'mi quij ni sij xi'í Yan'anj. Nî si garáj xina ni sij nga si-nuguan' chrej ni sij nga nni ni sij nej. Nî na'uej ruhua ni sij gataj ni sij si guruhua dugüi' ni sij. Nî nitaj si ní'yanj ni sij rian si-chrej Yan'anj mánj. ³ Nî si gahuin 'i ruhua ni sij nî'yaj ni sij ni dugüi' ni sij. Nî si ga'nin' ruhua ni sij si unun' ni sij nga dugüi' ni sij. Nî ga'mi snan'anj ni sij xi'í dugüi' ni sij. Nî na'ue dugumi ni sij man'an ni sij. Nî gahuin ni sij tsínj huee nin' ruhua. Nî gataj ruhua ni sij guini'yaj ni sij daran' nuguan' sa'. ⁴ Nî digya' yun'unj ni sij ni dugüi' ni sij. Nî dugu'nun' ni sij gui'yaj ni sij rasun gue. Nî gahuin nne nin' ruhua ni sij. Nî nano' ni sij güenda man'an ni sij sisi gahuin nia' ruhua urin man'an ni sij. Nî

s̄i nano' ni sij man'an Yan'anj mánj. ⁵ N̄i gūi'yaj ni sij sis̄i nico' s̄a' ni sij Yan'anj. San̄i ni rasun gūi'yaj ni sij ya'yoj digyán sis̄i nitaj si nico' ni sij Yan'anj mánj. Xi'í daj n̄i s̄i guinicaaj dugüí' re' nga ni tsínj 'yaj daj.

⁶ N̄i scanij ni tsínj daj, n̄i mán ni tsínj huan'anj gō'ngo hue' digya' yun'unj ni sij ni yun'unj x̄ana nun ni'í s̄a' huin ne ni yun'unj da'ui gaquin'. N̄i maan si nahuij ruhua ne nga nuguan' quij 'n̄a' chruhua niman ne. ⁷ N̄i n̄iganj digui'yun ne ni nuguan', san̄i nitaj aman gara da'nga' ruhua ne nuguan' x̄anga' mánj. ⁸ N̄i daj rún' gunun' n̄ungüej tsínj gu'naj Janes nga Jambres nga Moisés asij ná, n̄i hué daj na'uej ruhua ni tsínj daj nga nuguan' x̄anga'. N̄i huin ni sij ni tsínj ani quij ruhua. N̄i nun ní'yanj ni sij güenda si-chrej Yan'anj mánj. ⁹ San̄i s̄i gūi'yaj gana si-nuguan' ni sij mánj. Daj si x̄acaj daran' ni ngüi cuenta sis̄i tsínj n̄i'yun huin ni sij daj rún' gahuin nga n̄ungüej tsínj gunun' nga Moisés.

¹⁰ San̄i hué re' gunun s̄a' nuguan' digyānj rian ni ngüi nga si-chrē nej, nga si huin ruhuāj gūi'yā ne' chrej rian nej. N̄i ni'í re' daj xuman ruhuāj ni'yā Yan'anj, n̄i daj a'nin' ruhuāj nga ni ngüi. N̄i ni'í re' daj 'i ruhuāj ni'yā ni ngüi, n̄i daj gunucuaaj ruhuāj rian ni sayun nej. ¹¹ N̄i ni'í re' daj chran' yun'unj ni sij man'ānj, n̄i daj guiran'ānj sayun nej. N̄i hua ni'í re' daj guiran'ānj sayun xuman' Antioquía nga xuman' Iconio nej, xuman' Listra nej. San̄i gahuin ní'nij riānj rian ni sayun daj, gūi'yaj Señor. ¹² N̄i hua yya sis̄i daran' ni ngüi huin ruhua guinicaaj dugüí' nga Cristo Jesús, n̄i

guᵛiran' ni sij sayun xi'í Jesús. ¹³ Saᵛi ni tsínj xi'i nga ni tsínj digya' yun'unj, saᵛi ᵛaanj gahuin quij ni sij doj. Ni digya' yun'unj ni sij ni ngüi. Ni digya' yun'unj ni ngüi ni sij nej.

¹⁴ Ni man'án re', saᵛi ga gue gahuin ᵛica ruhua re' nga nuguan' gahuin chrᵛn re'. Daj si xuman ruhua re' sisi nuguan' daj huin nuguan' xanga'. Ni hua ni'í re' sisi ᵛn ngüi digyán nuguan' daj rián re'. ¹⁵ Ni asj ngaa hua líj re', ni hua ni'í re' si-nuguan' Yan'anj. Ni ga'ue gahuin chrᵛn re', gui'yaj nuguan' sa' daj. Ngaa ni ganacaj Yan'anj man'án re' xi'í si xuman ruhua re' ni'yáj re' Cristo Jesús. ¹⁶ Ni digyán Yan'anj nin' si garun ni tsínj ga'mi si-nuguan' Yan'anj. Ni nuguan' daj ní'yanj sisi digyán né' rian ni ngüi. Ni ní'yanj nuguan' daj sisi guini'i né' daj hua gaquin' da'ui né'. Ni sa' hua nuguan' daj sisi ᵛagui'yaj né' si-chrej né'. Ni ga'ue digyán si-nuguan' Yan'anj daj gahuin chrᵛn né' gache né' 'ngo chrej ᵛica. ¹⁷ Xi'í daj ni ga'ue gahuin sa' nin' né' huin né' tsínj nicaj dugüi' nga Yan'anj. Ni ga'ue gui'yaj né' daran' sun huin si-sun man'an Yan'anj.

4

Predica la palabra

¹ Ni rian Yan'anj nga Jesucristo, ni a'nij sun rián re'. Ni huin achij Jesucristo. Ni ga'na' sij ᵛagui'yaj yya sij nga si-gaquin' ni ngüi hua ni'na' nga ni ngüi hua gahui' nej. ² Ngaa ni a'nij sun rián re' sisi ᵛata' re' nuguan' sa' rian ni ngüi. Ni hué daj gui'yáj re', nᵛnj si hua ní'nij rián re', asj nitaj si hua ní'nij rián re'. Gaᵛaj re' rian ni ngüi

xi'í gaquin' da'ui ni sij. Nĭ gataj re' sisi nun 'yaj sa' ni sij. Nĭ dĭgyán re' 'ngo chrej sa' rian ni sij. Sanĭ nanaj ga'mi re'. Nĭ dĭgyán 'ueé re' rian ni sij. ³ Daj si ga'na' 'ngo güi ngaa na'uej ruhua ni ngüi gunun ni sij nuguan' sa'. Sanĭ gahuin ruhua ni sij gunun ni sij ango nuguan' naça. Nĭ xi'í daj nano' ni sij ga'i maestro dĭgyán ni sí' nuguan' aran' ruhua ni sij. ⁴ Nĭ naránj ni sij chraquij ni sij si na'uej ruhua ni sij gunun ni sij nuguan' xanga'. Nĭ maan cuento nne hua chruhua xungüi nan garan' ruhua ni sij gunun ni sij. ⁵ Sanĭ nĭganj ga cuidado man'án re' sisi gani sa' ruhua re'. Nĭ gahuin nucaj ruhua re' nga ni sayun rán' re'. Nĭ ganata' re' nuguan' sa' rian ni ngüi. Nĭ guĭ'yaj sun sa' re' nga daran' si-sún re'.

⁶ Nĭ xi'í si nico' man'ánj Yan'anj, ni ruhua guĭsij güi dagahui' ni sij man'ánj. Nĭ gahuin ni chrun' güi gahuĭj. ⁷ Nĭ daj rún' 'yaj 'ngo snado ngaa guĭ'yaj gana sij rian sayun, ni da'nga' daj guĭ'yā nga si-sünj. Nĭ guĭsĭj guĭ'yā nuguan' ga'nin' Yan'anj sun riánj. Nĭ 'ngo dugumĭ nuguan' xuman ruhua né' nej. ⁸ Yyaj ni ana'uĭ 'ngo si sa' guĭ'yaj Yan'anj ngaj. Nĭ daj rún' nun 'ngo corona chra tsínj guĭ'yaj sa', ni hué daj guĭ'yaj sa' Señor ngāj güi ga'na' ruhua' yún sij. Nĭ 'yaj niça Señor huin güesĭ. Nĭ sé urin rian man'ánj rĭqui sij corona da mánj. Sanĭ rĭqui sij rian daran' ni ngüi huin ruhua sisi ga'na' ruhua' yún sij.

Instrucciones personales

⁹ Guĭ'yáj re' sinduj si ga'na' ni'yaj yoo re' rian nnēj. ¹⁰ Daj si hua duna tsínj gu'naj Demas man'ánj xi'í si garan' doj ruhua sij ni'yaj sij ni

rasun man chruhua xungüi gaquin' nan. Ni hua gahui sij gan'anj sij xuman' Tesalónica. Ni gahui tsínj gu'naj Crescente gan'anj sij estado Galacia. Ni gan'anj tsínj gu'naj Tito estado Dalmacia nej. ¹¹ Urin Lucas nne ngāj. Guñicaj re' tsínj gu'naj Marcos ga'na' re' riānj. Daj si ni'yān si guisij sij chrauij sij nga si-sūnj, ruhuāj aj. ¹² Ga'nī tsínj gu'naj Tíquico gan'anj sij xuman' Efeso. ¹³ Ni ngaa ga'na' re', ni ñicaj re' si-chamarrāj dunā xuman' Troas ducua tsínj gu'naj Carpo. Ni hué daj ñicaj re' ni libro ga'na' re' nej. Ni rá'yanj ni'yān ni libro huin nnij.

¹⁴ Ni guiran'ānj nico sayun, gui'yaj Alejandro huin sij tsínj agan' gaga'. Ni daj rún' guiran'ānj sayun gui'yaj sij, ni hué daj gu'yaj Señor castigo sij, ruhuāj aj. ¹⁵ Ga' cuidadó re' rian sij. Daj si unun' ñin' ruhua sij nga nuguan' sa' a'mi únj rian ni ngüi.

¹⁶ Ni ngaa gan'anj sinij rian ni tsínj nicaj sun, ni duna daran' ni sij urīnj gunā. Sanj huin ruhuāj sisi si xacaj Yan'anj cuenta si gui'yaj ni sij ngāj mánj. ¹⁷ Sanj ganiquin' Señor ngāj. Ni riqui sij fuerza riānj nej. Ni ga'ue ganahuij ga'mī daran' nuguan' sa' rian ni ngüi 'na' anéj chrej. Ni hué daj gananij rian rey daj. Daj si daj rún' hua du'ua sigue'e hua du'ua sij. ¹⁸ Ni gu'yaj Señor sisi gananij rian daran' nuguan' quij huin ruhua ni sij gu'yaj ni sij riānj. Ni dugumi sa' sij man'ānj da gan'ān rian nicaj sun sij xata'. Ni ñiganj ga'mi 'ueé né' rian Señor. Amén.

Saludos y bendición final

¹⁹ A'nī 'ngo nuguan' huaj rian yun'unj xana gu'naj Prisca nga tsínj gu'naj Aquila nga ni ducua tsínj gu'naj Onesíforo. ²⁰ Guna tsínj gu'naj Erasto xuman' Corinto. Nī dunā tsínj gu'naj Trófimo a'nan' sí' xuman' Mileto. ²¹ Yoo gā'na' re' ngaa achin natu yahui nuhuij. Nī a'níj tsínj gu'naj Eubulo 'ngo nuguan' huaj rián re'. Nī hué daj 'yaj tsínj gu'naj Pudente nga Lino nej, yun'unj gu'naj Claudia nej, nga daran' ni jnánj né'. ²² Nī huin ruhuāj sisi gane Señor Jesucristo nga nimán re'. Nī Yan'anj gu'yaj sinduj rian daran' a ni é re', ruhuāj aj.

**Si-nuguan' Yan'anj Xanga'
Triqui, San Martín Itunyoso: Si-nuguan' Yan'anj
Xanga' (New Testament)**

copyright © 2019 Wycliffe Bible Translators, Inc.

Language: San Martín Itunyoso Triqui

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022

4be4034f-f0b9-59fa-84d1-c8a64bdef6d4